

■ CONVIVENZA

In GPS per la vita

DA PIEDER CAMINADA*

Avant 50 onns m'han mes geniturs fatg in dals pli custaivels regals ch'jau hai retschavi en mia vita: in GPS. Tge, in GPS?! Jau aud gia il protest: L'onn 1970 na devi anc nagins apparats da GPS... Gist!

Però mia istorgia da GPS è tuttina vaira. El-la ha ses origin tar T. Jau na numnel qua sapientivamain betg ses num cumplain. Primo hai jau emblidà ses prenum e secundo n'è ses num betg uschè impurtant per l'istorgia.

Nus scrivain l'onn 1970. Dapi var in mez onn sun jau en l'inter-nat da la scola claustrala da Mustér. Ed in di arriva quest T. en la sala da durmir da nus scholars da l'emprima latina ed involva mai e dus conscolars en in discurs. I va per la politica. Precis per la politica, da la quala jau pischarot da gnanc 14 onns n'hai nagin'idea. Nus al tadlain cun atenziun – pertge che T. n'è betg mo dus, trais onns pli vegl che nus, mabain er in bun scolar ed anc in meglier raquintader d'istorgias. El ans raquinta cun vusch plain ardiment da l'iniziativa cunter la surpopulaziun d'in tshert James Schwarzenbach che vegnia proximamain davant il pievel. Ed era da l'impurtanza



da proteger la Svizra da quella «canaglia taliana» che vegnia adina pli numerosa e ch'i saja da puspè tegnair ad aut las virtids svizras. T. n'è betg pli da franar. Guttin per guttin ans persvada el da ses odi cunter ils esters. E sco remuneraziun per noss'atenziun ans regala el anc gluvas che fan reclama per l'iniziativa da Schwarzenbach – natiralmain cun l'appel da purtar quellas gluvas bain visiblamain sin noss pèz.

Paucs dis pli tard sun jau sin visita tar mes geniturs. E – blagun ch'jau sun – emprov jau pelvaier da persvader mes geniturs da la necessitad da l'iniziativa da Schwarzenbach. Jau ves anc oz las fatschas petrifigadas da mia mamma e da mes bab. Els ma taidlan e taschan. Enfin che mia mamma di: «Navaira, ti sas schont ch'jau sun bain naschida e creschida si en Svizra, ma ch'jau sun stada

Taliana, fin ch'jau hai maridà.» E mes bab di be: «Ils Talians èn umans sco ti ed jau.»

Jau pens ch'jau na sun anc mai ma turpegia uschè profundamain sco en lez mument. Externamain sun jau vegnì marv sco ina pitga da sal ed internamain hai jau bragì grossas larmas da vargugna e miseria. Anc il medem di hai jau bittà la gluva en la sadella da lavadiras. Dapi lura ponderesch jau adina puspè tge ch'avess pudì capitar sche mes geniturs n'avessan betg regalà a mai quest GPS imaginar. In GPS imaginar sco mus-savia per la vita. Per fortuna hai jau quella giada chapì endretg lur messadi reduci sin duas frasis – e n'hai mai pli laschè ma tschorventar u schizunt m'instigar da personas sco T.

Dal reminent, il GPS da mes geniturs na ma di mai tge direenziun ch'jau duai prender tar in spartaviat. El ma recumonda be da patratgar in zichel avant che tscherner la direenziun: cun il chau, cun il venter – e surtut era cun il cor.

* Pieder Caminada è mainproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en il vitg rumantsch da Castrisch.